

四庫全書薈要

• 乾隆御覽本

史部

十國春秋卷一百二

檢討吳任臣撰

荆南三

列傳

武信王夫人張氏

夫人張氏者故武信王愛姬而文獻王之母也武信王
隸梁戲下時每行軍必挾夫人與俱一夕軍敗誤入深
澗中會夫人方妊文獻王宛轉不能起王懼追兵且至

竢夫人熟寢以巨劒刺兩岸期岸崩以厭之旣而夫人遽驚呼曰適夢泰山頽厭妾身賴金甲執戈者抵之獲免王遂挈之行未幾生文獻王以富貴終

武信王子從翊

從詵

從讓

從謙

武信王從子從嗣

從義

文獻王子保勲保正

保紳

保寅

保緒

保節

保遜

保衡

保膺

貞懿王子繼充

武信王五女

從翊武信王子也官合州刺史歸宋遷右衛將軍

從詵武信王弟

缺

子文獻王弟也繼冲時為牙將降宋

改右衛率府率

從讓武信王弟

缺

子入宋授左清道率府率

從謙武信王弟

缺

子降宋擢左司禦率府率武信王子

九人文献王而下知其名氏者四人餘不具見

從嗣武信王從子也為人驍勇有力喜馳突深入敵軍
率以為常積功至雲猛指揮使天成三年楚武穆王遣

許德勲入寇以其子希範為監軍師次沙頭從嗣恃勇單騎造楚壁請與希範挑戰決勝負為楚將廖匡齊所殺王懼遂與楚和

從義亦武信王從子也視貞懿王為季父行顯德時從嗣謀作亂其徒高知訓告變貞懿王命徙于松滋已而殺之竟以不良死

保勲文獻王第一子保正文獻王第二子皆貞懿王兄也文獻王十五子今可考者保勲保正文懿王保紳保

寅保緒保勗保節保選保衡保膺十一人而已

保紳文獻王第

缺

子也周顯德時貞懿王與世宗通好

以為器械金帛不足以效忠節乃命保紳入朝致歸順之意世宗大悅遂詔以泰州鹽給荆南牙兵保紳歷官江陵少尹歸宋擢衛尉卿

保寅字齊巽文獻王第

缺

子晉天福七年以蔭授太子

舍人賜緋累加檢校司空貞懿王時奏授節院使宋興保勗既襲荆南節鎮命保寅入覲汴京太祖召對便殿

慰籍甚至授掌書記遣還保寅語保勗曰真主出世天
將混一區宇兄宜首率諸國奉土歸朝無為他人取富
貴資保勗不聽及宗將慕容延釗等征武陵道出荆口
保寅奉牛酒犒軍太祖嘉其功驛召赴闕除將作監充
內作坊使賜第一區餞知宿州乾德四年丁母艱起復
轉少府監開寶五年知懷州歷司農衛尉二卿是州本
隸河陽時趙普為帥與保寅素有隙事多抑制保寅心
不能平手疏請罷支郡之制宋太宗從之頗寢其言又

為西川諸州都巡檢使改光祿卿歷知同汝二州改光
化軍卒年六十八計聞朝廷賻錢十萬廢朝一日初保
寅在懷州日蘇易簡王欽若並童年始趨學在同州錢
若水為從事在光化軍張士遜其邑人也保寅皆加獎
拔許以遠大之器世多其能知人子輔政輔之輔堯輔
國並進士及第

保緒文獻王第

缺

子繼冲時官左衛都將入宋擢鴻臚

少卿

保節文獻王第

缺

子也生而穎異官右衛都將娶功臣

王保義女納土後宋除為司農少卿

保遜事繼冲為牙將文獻王子也入宋太祖命為左監門衛將軍

保衡文獻王第

缺

子累官巴州刺史及繼冲納土宋改

為歸州刺史

保膺亦文獻王子起家知峽州事入宋署為本州刺史繼充貞懿王之子也貞懿王二子長曰繼冲次曰繼充

繼充官至歸州刺史又有高繼申者宋初為大理卿疑亦南平諸從也以世系未詳姑闕畧焉

武信王五女失其名相傳五女俱幼年好道薙髮為女僧各止一處一曰佛華寺一曰菩提寺一曰莊嚴寺一曰石佛寺一曰法輪寺

王保義

司空薰

倪可福

鮑唐

王保義江陵人武信王署行軍司馬與司空薰梁震同為賓客多所裨益文獻王時襄州安從進叛晉結援于

王王外為拒絕而陰實與之相通及從進來乞師王知大小之勢不敵遂陽責以大義且以禍福諭焉從進不寤于是誣王有異志保義力勸王白其狀願舉兵助晉以釋晉主之疑識者韙之累官武泰軍留後改平江軍節度使子貞範惠範延範有傳

司空薰其先臨淮人唐知制誥圖之族子也武信王鎮荆南薰與梁震王保義等偕居莫府遇事時多匡正梁亡唐莊宗入洛下詔慰諭藩鎮薰固勸武信王朝京師

用結唐主心時梁震切諫不可而武信王卒從薰言幾不得脫歸然唐舍江陵而竟先滅蜀者亦薰一言力也薰後事不見于史未詳所終

倪可福

江陵志餘作倪福可非

人也唐天祐三年武信王權

荆南留後而可福時為駕前指揮使會朗州雷彥恭屢犯荆南梁王全忠遣可福率官兵五千人戍之可福指畫方略力拒彥恭朗兵稍稍引去已而又築寸金堤激水捍蜀有功

江陵志餘云寸金隄在西門外將軍倪福可所築謂其堅厚寸寸如金也

武信

王愛其勇使隸戲下為親校且以女妻可福子心相得

也可福摧鋒陷陳所向克敵李洪來寇江陵可福以兵

擊敗之推為首庸俄遷都指揮使龍德時江陵城圯可

福以卒萬人修外郭不時築武信王責功程之慢杖之

百歸謂女曰幸語汝舅吾欲威衆辦事耳非示辱也以

白金百鎰遺之

按楚志云可福季興壻也築城愆期季興怒奪其妻可福併力完之高乃盛為

裴奩遣還今從通鑑所載楚志似誤

可福竟以功名終賜田于江陵東三

十里子孫聚居其處號曰諸倪岡

江陵志餘云諸倪岡有轉魚臺乃將軍倪

福可故宅又云倪軍市在城東六十里倪福可屯軍之所
地有八井歲久堙沒又有倪將軍廟在城西五里以其
有修隄功故祀之

鮑唐故梁復州知州為吳將李簡所執已而歸武信王
武信王俾同倪可福隸戲下遂與可福齊名

梁震

孫光憲

梁震邛州依政人也初名霑會唐郎中劉象隨僖宗入
蜀震以所業詩詣象象曰君才思敏妙定成大器若不
更名將慮小阻緣製名雨下從謂以雨謂人未得輒見

請易震字震從辰辰者龍也龍遇雨變化必矣因改今
名未幾登進士第流寓京師梁開平初歸蜀道過江陵
武信王喜其才識留之不遣欲奏為判官震自以唐臣
耻為強藩屬吏即亡去又恐及禍乃曰震素不慕榮宦
明公不以震為愚必欲使參謀議但以白衣侍樽俎可
也王心重之俾與司空薰王保義同為賓客而震獨不
受辟署稱前進士王亦時時呼為先輩唐莊宗滅梁薰
等咸從史王朝京師震堅沮以為不可曰唐有併吞天

下之志嚴兵守險猶恐不自保況數千里入覲乎且大王梁室故將安知彼不以讐敵相遇行當為鹵爾王不從而束身朝唐卒斬關始得出歸謂震曰不用君言幾不免虎口及唐師滅蜀王方食落箸而嘆曰老夫過也震曰唐主得蜀益驕亡無日矣安知不為我福已而莊宗果罹鄴都之禍由是益加親信明宗時唐遣房知溫領軍入犯武信王伺其兵少欲開城盡殲之震諫曰朝廷禮樂征伐所出兵雖少而勢甚大加四方諸侯各以

吞噬為志若大王不幸得戰勝則中朝徵兵四方其誰不欲仗順而取大王土地邪為大王計莫若致書主帥且以牛酒為獻然後上表自劾如此庶幾可保會王寢疾不起文獻王繼立尤委任震以兄禮事之震常謂王為郎君一日王語震曰吾自念平生奉養已過今欲捐一切玩好以經史自娛省刑薄賦境內以安是吾願也震知王克勝厥任因曰先王待我如布衣交以嗣王屬我今幸不墜先業吾老矣不復事人矣固請退居監利

王為之築室于土洲上

江陵志餘名梁家臺

震披鶴氅逍遙若仙

自稱荆臺隱士

堯山堂外紀曰震晚年稱荆臺隱士題院中壁云桑田一變賦歸來爵祿焉能

免我哉黃犢依然花竹外清風萬古凜荆臺

每詣府輒跨黃牛至聽事以為

常王亦時過其家斗酒相勞歡叙平生四時賜予甚厚

遂以是終其天年所著文集一卷行世先是有薛少尹

者擅相人之術震同進士董與杜無隱往叩薛曰梁秀

才此舉必捷然登第後一命不沾也後竟如其言繼震

輔政者則有孫光憲

孫光憲字孟文貴平人

北夢瑣言作富春人

家世業農至光憲獨

讀書好學唐時為陵州判官有聲天成初避地江陵武
信王奄有荆土招致四方之士用梁震薦入掌書記王
方大治戰艦欲與楚角光憲諫曰荆南亂離之後賴公
休息士民始有生意若又交惡於楚一旦他國乘吾弊
良足憂也王乃止文獻王立會梁震乞休悉以政事委
光憲王居恒羨馬氏豪靡謂僚佐曰如馬王可謂大丈
夫矣光憲曰天子諸侯禮有等差彼乳臭子徒驕侈僭

汰取快一時危亡無日又足慕乎王忽悟曰公言是也
為悔謝者久之光憲事南平三世皆處幕中累官荆南
節度副使朝議郎檢校祕書少監試御史中丞賜紫金
魚袋繼冲時宋使慕容延釗等平湖南假道于荆約以
兵過城外大將李景威勸繼冲嚴兵備之光憲叱之曰
汝峽江一民爾安識成敗中國自周世宗時已有混一
天下之志况聖宋受命真主出邪王師未易當也因教
繼冲去斥堠封府庫以待悉獻三州之地宋太祖嘉其

功授光憲黃州刺史賜賚加等在郡亦稱治乾德末卒

光憲博物稽古先是唐元和中裴宙鎮荊州掘地得一

石規模悉倣江陵城制命徙置他所輒淫雨不止仍復

舊處天乃霽一曰文獻王經其地顧問光憲光憲曰昔

伯禹治水自岷至荆定彼泉源之穴慮萬世下或有汎

濫爰以石屋鎮之耳王大加嘆賞益重之性嗜經籍聚

書凡數千卷或自鈔寫孜孜校讐老而不廢自號葆光

子所著有荆臺集橘齋集玩筆傭集輦湖編玩北夢瑣

言蠶書若干卷

容齋三筆載有貽子錄疑亦光憲輩誤

又誤續通歷紀事

頗失實太平興國初詔毀之光憲素以文學自負處荆南快快不得志常慕史氏之作頗恨居諸侯莫府不足展其才力每謂知交曰寧知獲麟之筆反為倚馬之用光憲又雅善小詞蜀人輯花間集采其辭至六十餘篇子謂謹○光憲常諫保勗曰宋有天下詔書皆合仁義湯武之君也公宜克勤克儉勿奢勿僭上以奉朝廷中以嗣祖宗下以安百姓見長編

論曰南平起家僕隸而能折節下賢震以謀畧進光憲

以文章顯卒之保有荆土善始善終區區一隅歷世五

缺

亦得士力哉

十國春秋卷一百二

十國春秋卷一百三

檢討吳任臣撰

荆南四

列傳

李載仁

倪從進

王貞範

王惠範

弟延範

康張

魏璘

王昭濟

王崇範

李載仁唐室之遠裔也開平初避亂來江陵武信王署
為觀察推官自負才學深為王所嘉賞從容接待禮遇

有加然性迂緩頗不厭衆心文獻王時稍遷至郎中一日赴王召甫上馬而部曲相毆載仁怒急命于厨中索飯及豕肉令毆者對食仍戒曰苟再犯必當于豕肉中加酥間者咸以為笑又與妻閤異室而處一日閤忽叩閣至載仁亟取百忌歷視之大驚曰今夜河魁在房那可就宿其舉止多此類也及孫光憲掌書記牋奏書檄皆出載仁右載仁充位而已由是與光憲有隙光憲稍稍避之人以光憲為長者

載仁常為光憲言曾目睹梁相張策弟簾輕易道教因脫

褒服挂天尊臂上戲云為我掌之俄頃精神恍惚
似遭毆擊痛叫狼狽歸至別業而卒亦異事也

倪從進武信王之子婿也父可福為武信王大將從進以
蔭得官復娶王女甚貴寵一時皆艷慕之功臣子與王家
為昏姻可知者王保義子惠範及可福子從進凡二人云
王貞範平江節度使保義子也事文獻王為推官累官
少監素精于春秋有駁正杜預左傳註數百條人多訝
之獨與同官孫光憲說春秋義合兩人心相得也女弟
故所稱荆南仙女者恒時夢異人授琵琶樂曲二百餘

調命曰此曲譜屬元昆製序當刊石于甲寅之方于是
貞範如女弟指為製序刊所傳曲有道調玉宸宮闕則

宮神林宮蕤賓宮無射宮玄宗宮黃鍾宮散水宮仲呂

宮商調獨指泛清商紅銷商風商林鍾商醉吟商玉仙

商高雙調商角調醉吟角大呂角南宮角中宮角蕤

賓角羽調鳳吟羽風香羽應聖羽玉宸羽香調大呂

調而曲名間有同人世者如涼州渭州甘州綠鬃莫

艱傾盆樂安公子水牯子阿泛濫之屬摹本流傳一時

咸詫以為異

王惠範亦保義子也善修飾喜讀書以門蔭為文學遷
觀察推官文獻王妻以女且以惠範本將家子命掌幕
中內外軍政惠範豪邁不羈頗以簿書符牒為俗務入
告王辭之自是以王為不知己凡軍府大事皆不參預
但以金帛購古書圖畫日披翫為志焉弟延範形貌奇
偉性任俠家富於財好施不倦文獻王署為太子舍人
後從繼冲入宋官大理丞知泰州太平興國中為廣南

轉運使

康張事文獻王為硤州長陽令有良吏才一邑稱治與少監孫光憲時相往還云

魏璘不知其家世事貞懿王為指揮使勇畧絕倫顯德中周世宗南征徵兵于王王命璘帥兵三千人趣夏口以會周師居二年周與唐構兵璘復統戰艦五百艘駐鄂州以助戰周主嘉貞懿王功優詔慰諭荆南自倪可福鮑唐之後故推璘為名將同時又有客將陸扶者驍

果亦亞于璘王昭濟故客將也宋師旣入江陵繼冲命昭濟與蕭仁楷奉表納土宋太祖嘉其功署昭濟左領軍衛將軍仁楷亦除供奉官後不知所在

王崇範事繼冲為支使納土後遣崇範詣闕貢金器五百兩銀器五千兩錦綺二百段龍腦香十斤錦繡帷幕二百事宋太祖擢崇範節度判官終于其職

李景威

梁延嗣

李景威荊州長陽人也文獻王時未知名及仕貞懿王

擢水手都指揮使繼冲代保勗節鎮景威時為帳下親校會湖南張文表之亂周保權求救于宋宋命慕容延釗等往討復詔江陵發水軍赴潭州繼冲遣景威將兵三千人以待未幾宋師假道荆南聲言兵過城外景威曰兵尚權譎城外之約其可信乎以臣觀之直欲乘釁伐我耳方今精卒數萬訓練甚備莫若嚴兵整旅以禦之臣雖不才願盡以相付少監孫光憲固謂不可景威出而歎曰吾言不用大事去矣何用生為因扼吭而死

宋太祖聞之曰忠臣也命王仁贍厚卹其家先是景威語繼冲云舊傳江陵諸處九十九洲滿百則王者興武信王之初江心深浪中忽生一洲今此洲遽爾漂沒若可憂也繼冲殊不為意遂至于亡國

梁延嗣京兆長安人

三楚新錄云復州景陵人

唐同光中將兵守復

州監利

按五代史云監利故屬復州梁割隸江陵据此則武信王得監利之後始屬荊州矣

武信

王之朝唐也莊宗欲陰圖之既疾趨歸遂以兵攻監利星沙二縣延嗣兵敗為王所獲至文獻王立擢為大校

承制授歸州刺史已又領復州團練使仍掌親軍歷事
貞懿王及保勗保勗疾革召延嗣語之曰我疾遂不起
兄弟中孰可寄後事者延嗣曰公不念貞懿王乎先王
寢疾以軍府付公今先王子繼冲長矣保勗曰子言是
也即以繼冲判內外兵馬繼冲之得立延嗣功居多焉
及繼冲納土延嗣與孫光憲實勸之宋以歸順功授復
州防禦使充湖南前軍步軍都指揮使兼排陳使後因
郊禮自復州入朝太祖慰撫之曰使高氏不失富貴爾

之力也改濠州防禦使有善政詔書褒美延嗣頗知書
好接士常暴疾禳于城隍神是夕夢神人告以九九之
數俄疾愈年八十一卒延嗣起家行伍居恒諱健兒士
卒之語一日與孫光憲同赴毬場光憲上馬左右掖之
者頗衆延嗣在後戲曰孰謂大卿年老而彌壯邪良由
扶持力爾光憲回顧曰非是衆扶蓋是老健延嗣不勝
怒論者少之

論曰江陵之失也景威絕吭以殉可謂忠矣延嗣力勸

納款俾高氏終保富貴其殆譙周之流歟然而為延嗣
易為景威難事故未可成敗論也景威真濁世之佼佼
者哉

溫克修

王處士

溫克修故江陵司藥庫吏也唐天復中與術者向隱處
隱告以江陵更變且無定主五年後東北上有人依稀
國親鎮此邦二十年他日又曰東北來者二十年後更
有一人五行不管此程更遠及武信王為荆南留後先

是賜姓曰朱隨復本姓果符國親之說天成二年唐軍圍江陵時文獻王以王子守城克修因以隱言白之文獻王未之信也明年武信王薨凡二十一年而文獻王襲位人以為其言有驗

王處士者不知何許人文獻王時居江陵以善卜名周晉王柴榮之未貴也以布衣與大商頡跌氏貨殖荆南一日過處士卜方布卦忽一著躍出卓然而立處士大驚曰吾家筮法十餘世矣每受高曾遺言凡卜筮自躍

而出者其人貴不可言况復卓立不傾得非為天下主
乎遽起再拜榮雖陽為詰責而私心甚喜後果承郭氏
之後踐皇帝位一如處士言

僧齊己

僧文了

荆南僧

僧齊己益陽人本佃戶胡氏子也

俗名胡得生

七歲居大瀉

山寺與諸童子牧牛天性穎悟常以竹枝畫牛背為詩

詩句多出人意表衆僧奇之勸令落髮為浮圖時都官

鄭谷在袁州以詩名齊己攜所詩往謁有云自封修藥

院別下著僧牀谷覽之曰將改一字方可相見經數日
再過稱已改得云別掃著僧牀谷嘉賞焉結為詩友又
齊已有早梅詩中云昨夜數枝開谷為點定曰數枝非
早不若一枝佳耳人以谷為齊已一字師久之居長沙
道林寺湖南莫府號能詩者徐仲雅廖匡圖劉昭禹輩
靡不聲名藉甚而仲雅尤傲忽雖王公不避獨見齊已
必悚然不敢以衆人相遇齊已故贅疣至是愛其詩者
或戲呼之曰詩囊無何將遊蜀武信王習齊已名遮留

之龍德元年禮齊已于龍興寺署為僧正時降手牘慰
藉良厚然居恒多鬱鬱不樂僧虛中貽詩云老負峨嵋
月閑看雲水心蓋傷其志也齊已既托迹江陵惟事筆
墨自娛乃作渚宮莫問篇十五章以述懷頃之唐秦王
從榮召入侍中秋大宴齊已窺從榮藏異志有東林莫
碍漸高勢四海正看當路時之句幾以諷刺得罪已而
脫歸荆南賴武信王匿之獲免其不屈節侯王類如此
梁震晚年酷好吟咏尤與齊已善互相酬答齊已竟終

于江陵自號衡嶽沙門

一云齊已于豫章西山金鼓寺
寂有塔存焉龍盤其書堂也

有詩八百首孫光憲序之命曰白蓮集齊已常于瀉山
林下遇一僧于指甲下出二劍凌空躍去蓋劍俠也時
時為人道之又同僧仰山住豫章觀音院作粥疏曰粥
名良藥佛所贊揚義冠三檀功標十利更祈英哲各遂
願心既備清晨永資白業禪流稱其辭謂當與食時五
觀並傳

文了吳僧也雅善烹茗擅絕一時武信王時來遊荆南

延住紫雲禪院日試其藝王大加欣賞呼為湯神奏授
華定水大師人皆目曰乳妖

荆南僧失其名氏以鬻香為業清泰中貨平等香貧富
無二價居常絕不市香和合而篋中所貯都梁鬱金輒
取售無算人莫測其從來皆疑為仙者

荆南仙女

荆南仙女者平江節度使王保義女也兒時聰穎不凡
五歲通黃庭內外經及長善琵琶一夕夢涉水登山巔

見金銀宮闕中有仙人披羽服自稱曰麻姑傳以樂曲
自是每夕輒夢遇之即指授音律歲餘得百餘調都非
人間所曾有其尤者名獨指商以一指彈一曲更為擅
奇已而適文獻王子保節復夢麻姑至曰即當相邀明
日庭中聞雲鶴音樂仙女奄然而逝

十國春秋卷一百三

十國春秋卷一百四

檢討吳任臣撰

北漢一

五代史作東漢十國紀年及通鑑作北漢今從之

世祖本紀

世祖姓劉名旻高祖之母弟也同為章懿皇后所出

薛史

云崇高祖從弟晉陽見聞要錄

云仲弟今據歐陽史曰母弟

初名崇為人美鬚髯目

重瞳子少無賴嗜酒好博常黥為卒高祖事晉為河東節度使署崇馬步都指揮使高祖即帝位除太原尹未

幾遷北京留守同中書門下平章事隱帝時改河東節
度使累加兼中書令隱帝年少政在大臣郭威為樞密
使有大功而與崇素不相能崇與屬吏鄭珙謀乃罷上
供征賦籍民為兵以自固乾祐三年隱帝遇弒崇業謀
舉兵會樞密使威反狀已白而隱帝諸大臣不即推尊
之故未敢即立謬請立崇子贊為嗣是時人皆知威非
實意而崇獨私心喜曰吾兒為帝吾又何求乃罷兵

按漢

隱帝實錄初議立徐帥太后遣中使馳諭劉崇請崇
入續大位崇知立其子上章謙遜恐無此事今不取威

少賤黥其頸上為飛雀世謂之郭雀兒至是見崇使者具道所以立贊之意因自指其頸以示使者曰自古豈有雕青天子幸公無以我為疑崇益喜信以為然太原少尹李驤勸其以兵下太行控孟津俟變崇大罵驤離間父子命牽出斬之并殺其妻以其事白于太后以明無它已而威果代漢是為周太祖降封贊湘陰公崇遣牙將李晉奉書于周求贊歸太原周主報以湘陰比在宋州今方取歸京師必令得所公勿為憂但能同力相

輔當加王爵永鎮河東崇知贊不得歸始有自立意

乾祐四年春正月戊寅帝即位于晉陽仍用乾祐年號

所有者并汾忻代嵐憲隆沁遼麟石諸州之地

案通鑑劉崇所

有者并汾忻代嵐憲隆蔚沁遼麟石十二州之地歐史職方考則云自太原以北十州為東漢而無隆蔚二州之名要而論之晉高祖割山前七州山後九州以畀契丹而蔚州實在其中則通鑑以蔚州為北漢有者誤也至隆州乃北漢所置備載地理以節度判官鄭珙為中表中今列其名以補歐史之闕

書侍郎觀察判官趙華為戶部侍郎並同平章事以次子承鈞為侍衛親軍都指揮使太原尹以節度副使李

存瓌為代州防禦使裨將張元徽為馬步軍都指揮使
陳光裕為宣徽使是日周殺湘陰公贊于宋州帝以地
狹民貧祭祀祖禰畧如家人禮不建宗廟月俸宰相百
緡節度使三十緡其餘薄有資給是時遼將潘聿撚稱
君命遺書皇子承鈞帝令承鈞復書言本朝淪亡紹襲
帝位願循晉室故事求援北朝許之丙戌發兵屯陰地
黃澤團柏丁亥以承鈞為招討使與副招討使白從暉
都監李存瓌將兵萬人侵周晉州帝聞湘陰公死大慟

哭為李驤立祠歲時祭之二月戊戌我兵五道攻晉州
周節度使王晏閉城不出承鈞令將士蟻附登城晏伏
兵奮擊我師敗績副兵馬使安元寶降周癸卯移軍攻
隰州周隰州刺史許遷遣步軍都指揮使孫繼業迎擊
於長壽村執我牙將程筠殺之未幾我兵薄州城攻數
日不克遂引還丁巳遣通事舍人李訥使于遼乞兵為
援三月甲戌訥至于遼遼主元欲即遼世宗也通鑑作永康王與帝
約為父子之國使拽刺梅里來報聘己卯周遣敗卒二

百六十餘人還大原各賜衫袴巾履夏四月遼遣使來

告周使田敏約歲輸錢十萬緡帝命宰相鄭珙以厚賂

謝遼自稱姪皇帝致書于叔天授皇帝五月辛未珙卒

于遼甲戌定難節度使李彝殷稱藩于我六月遼主遣

燕王述軋政事令高勲

遼史作燕王牒
竭樞密使高勲

冊命帝為大漢

神武皇帝妃為皇后又以黃騮九龍十二稻玉帶報聘

帝更名旻秋七月翰林學士衛融等詣遼謝冊禮且請

兵九月招討使李存瓌自團柏擊周遼欲引兵來會與

諸將議于九十九泉諸將皆不欲南行遼主強之癸亥
行次新州之西火神淀燕王述軋及偉王之子太寧主
漚僧作亂弑其君兀欲丁卯齊王述律代立上尊號曰
天順皇帝改元應歷自火神淀入幽州遣劉承訓來告
哀帝命樞密直學士王得中如遼賀即位復以叔父事
之請兵以擊晉州隨遣使如遼行弔禮冬十月辛卯周
潞州巡檢使陳思讓敗我兵于虎亭甲辰遼遣彰國節
度使蕭禹厥率兵五萬來會帝帥兵二萬出陰地關攻

晉州

五代史王峻傳曰劉旻攻晉州峻為行營都部署至陝州劉不進太祖遣使者翟守素馳至陝州諭

峻欲親征峻屏左右謂守素曰晉州城堅不可近而劉旻兵銳亦未可當臣所以留此非怯也蓋有待爾且陛下新即位四方藩鎮未有威德以加之豈宜輕舉而兗州慕容彥超反迹已露若陛下出汜水則彥超入京師陛下何以待之守素馳還具道峻言是時太祖已下詔西幸聞峻語遽自提其耳曰幾敗吾事乃止不行丁

未軍于城北三面置寨周巡檢使王萬敢龍捷都指揮

使史彥超虎捷指揮使何徽共拒之十二月乙巳王峻

引兵救晉州晉州南有蒙阮最險要峻憂我兵據之是

日聞前鋒已度蒙阮喜曰吾事濟矣

王峻傳曰峻軍出自絳州前鋒報過

蒙阮峻喜謂其屬曰蒙阮晉絳之險也旻
不分兵扼之使吾過此可知其必敗也 帝攻晉州久

不克會大雪我軍乏食契丹兵思歸聞峻至燒營宵遁
峻入晉州乃遣行營都指揮使仇弘超等將兵追于霍
邑縱兵奮擊我兵大敗墜崖谷死者無筭周將藥元福
曰劉旻悉發其衆挾契丹而來志吞晉絳今氣衰力憊
狼狽而遁不乘此剪撲必為後患王峻遣使止之遂解
去契丹兵至晉陽士馬什喪三四禹厥耻無功釘大將
一人于市旬日而斬焉帝始息意于進取是時內供軍

國外奉契丹賦役繁重民不聊生逃入周境者甚衆

乾祐五年春正月遣兵侵周府州為防禦使折德扆所

敗

殺二千餘人

二月庚子德扆入寇陷岢嵐軍以兵戍之是

月帝置寧化軍于嵐州界又置雄勇鎮於其北備周師

也夏四月丙戌朔日食六月壬寅帝以周人犯邊遣使

求援于遼遼主命中臺省右相高模翰赴之冬十月甲

申朔遣使于遼進葡萄酒十二月癸未高模翰及我兵

圍晉州是歲麟州刺史楊崇訓歸款于周初崇訓父信

受命于周為刺史及信卒崇訓以州來降至是為羣羗所圍叛去

後復歸于我

六年春閏正月壬午遣使謝遼以高模翰却周軍故也三月庚辰朔南唐遣使貢遼因附書于我遼主詔達其貢丁酉遣使進遼毬衣及馬夏五月壬寅遣使如遼言石晉樹嗣聖皇帝聖德神功碑為周人所毀請再刻許之秋八月遣使如遼乞援九月庚子貢藥于遼十一月遼葬貞烈皇太后于祖陵帝遣使會葬冬十二月喬贊

侵周府州折德展拒于城下我師敗績

乾祐七年春正月周主殂于滋德殿丙申晉王榮即皇

帝位帝聞周主晏駕遣使于遼謀大舉伐周二月遼遣

武定節度使政事令楊衮

遼史作政事令耶律敵

將鐵馬萬騎及

奚諸部兵五六萬人號稱十萬來會于晉陽

晉陽見聞錄云衮帥

騎六七萬號十萬來會

帝自將兵三萬以義成節度使白從暉為

行軍都部署武寧節度使張元徽為前鋒都指揮使

周世

宗實錄作張暉領三千騎為前鋒非是

與契丹兵南出團柏丁巳我兵屯

梁侯驛昭義節度使李筠遣牙將逆戰于大平驛張元徽斬其將穆令均筠遁歸上黨三月我兵乘勝逼潞州引兵而南是時周主新即位以謂我國幸周有大喪必不能出兵宜自將以擊其不意周臣多勸其山陵有日人心易搖不宜輕動周主曰以吾兵力之強破旻如泰山壓卵耳

五代史馮道傳劉旻攻上黨周世宗曰劉旻少我謂我新立而國有大喪必不能出兵以

戰且善用兵者出其不意吾當自將擊之道乃切諫以為不可世宗曰吾見唐太宗平定天下敵無大小皆親征道曰陛下未可比唐太宗世宗曰劉旻烏合之衆若遇我師如山壓卵道曰陛下作得山定否世宗怒起去

卒自將
擊旻

遂銳意親行癸巳前鋒與我兵遇于高平南之

高原

周世宗實錄云甲午賊陳于高平南之高原今從十國紀年作癸巳

我兵少却周主

趣諸軍亟進帝以中軍陳于巴公原張元徽居東偏楊

衮軍西偏而周師亦列為三陳李重進白重贊將左樊

愛能何徽將右向訓史彥超居中央張永德以禁兵衛

周主周主介馬自督戰衮望周師謂帝曰勅敵也未可

輕動帝奮髯曰時不可失請公勿言衮怒而去時東北

風方盛俄而遽轉南風副樞密使王延嗣使司天監李

義白帝云時可戰矣帝從之號令東偏先進王得中叩馬諫曰義可斬也南風勢急非北軍之利宜少待帝怒即麾元徽戰元徽擊右軍兵始交周將愛能徽引騎兵先遁右軍潰于是步卒數千餘人棄甲來降元徽呼萬歲聲振川谷敵兵大駭周主忽赫怒躍馬入陳引五十人直衝帝之牙帳帝方張樂飲酒示閑暇及其奄至殊驚惶失次周主因親犯矢石督戰士士莫不以一當百奮勇爭先周將趙匡馬仁瑀馬全义及永德等摧鋒

陷陳勢不可遏帝趣元徽進兵會馬躡元徽為周兵所
殺我軍由是氣奪帝自麾赤幟收軍軍驟退不能止互
相蹂躪遂大敗日暮帝收餘兵萬人阻澗而守是時劉
詞將周之後軍未至及戰已勝而詞軍繼至復乘勝擊
我兵王延嗣死之帝又大敗輜重器甲乘輿服御物皆
為周人所獲

五代會要云周廣順三年六月河南河北諸州旬日無鳥既而聚澤潞之間山谷中

集于林木壓樹枝折至顯德元年河東劉崇為周師所敗伏屍血流故先萌其兆

丁酉周主至

潞州帝自高平被褐戴笠乘契丹所贈黃騮率百餘騎

由鵲窠嶺間道馳去夜失道山谷間得村民為鄉導誤趣晉州行百餘里乃覺遂殺導者晝夜兼行所至得食

未舉箸或傳周兵至輒倉皇而去帝衰老力憊伏馬上

馳驟殆不能支僅得循他道以歸是役也袞畜怒按兵

西偏不戰故獨全軍而返

陶岳五代史補曰劉崇覲周世宗兵少詔諸將曰吾觀周

師易與耳契丹之衆宜弗使但以本軍決勝不惟破敵亦足使契丹見而心服乃使人謂契丹主將曰柴氏與吾主客之勢已見必不煩足下餘刃敢請勒兵登高觀之可也契丹不知其謀從之洎世宗之入陣也三軍皆賈勇爭進契丹望而畏之故

帝歸為黃騮治廐飾以金

不敢救今從薛氏五代史

銀食以三品料號自在將軍庚子帝收散卒繕甲兵完
城塹以備周楊衮將其衆北屯代州帝遣王得中送衮
歸因求救于遼遼主遣得中還報許發兵救晉陽壬寅
周以符彥卿為河東行營都部署郭崇副之向訓為都
監李重進為馬步都虞候史彥超為先鋒將步騎二萬
發潞州入寇又命王彥超韓通自陰地關入與彥卿合
又以劉詞為隨駕都部署白重贊副之是月昭聖皇太
后李氏殂于汴京西宮夏四月孟縣降周乙卯汾州防

禦使董希顏叛降于周丙辰遼州刺史張漢超叛降于周周主初遣符彥卿等內侵但欲耀兵晉陽城下洎周師入境百姓爭言我國賦役過重願供軍須助攻太原周主始有兼并之意旣而周諸軍數十萬剽掠不已百姓失望更保聚山谷辛酉憲州刺史韓光愿嵐州刺史郭言舉城降彥卿壬戌周王彥超等陷石州執我刺史安彥進癸亥沁州刺史李廷誨降周庚午周主發潞州趣太原癸酉忻州監軍李勅叛殺我刺史趙臯及遼通

事楊耨姑舉城降周周以勅為忻州刺史五月乙亥遼

遣南院大王撻烈來援丙子周主至太原旗幟環城四

十里是日代州防禦使鄭處謙舉城降周先是楊衮疑

處謙有二心使騎兵守城門處謙殺之閉門拒衮衮奔

歸遼遼主以其無功囚之處謙遂叛丁丑周置靜塞軍

于代州以處謙為節度使契丹屯數千騎于忻代間為

我援兵庚辰周主遣符彥卿擊之彥卿入忻州契丹退

保忻口丁亥周置寧化軍於汾州以石沁二州隸焉丁

酉撻烈敗彥卿于忻口周代州將桑珪等誣鄭處謙通
遼殺之時王得中自遼返留代州珪并執送于周軍周
將史彥超與契丹戰死周主初來攻晉陽彥卿彥超北
控忻口以斷契丹援路而晉陽城方四十里周師去城
三百步圍之匝百計攻之不能克彥卿旣數為契丹所
挫至是復以身殉周主于是徵懷孟蒲陝丁夫數萬亟
攻晉陽會久雨士卒皆罷病乃議引還

按周世宗實錄
會大雨軍士勞

苦又聞忻口之師不振帝數日憂沮不食遂決還京之
意又晉陽見聞錄云六月旦周師南轅反旆惟數百騎

間之以步卒千人長槍赤甲銜趨捷跳梁於城隅晡晚殺行而抽退今從周世宗實錄

甲辰周殺

我樞密直學士王得中乙巳周主班師發太原周匡國

節度使藥元福言于周主曰進軍易退軍難周主曰一

以委卿帝出兵追之元福乃勒兵成列而殿我師敗績

周盡棄所得州縣惟桑珪據代州不下

珪既叛我又不敢歸周故嬰城

自帝遣兵攻拔之是役也周主與帝相拒于高平豫令

前澤州刺史李彥崇將兵守江豬嶺遏帝歸路彥崇聞

樊愛能等南遁引兵退至是帝果自其路走太原周主

貶彥崇為率府副率指樊愛能何徽等責之曰若輩累朝宿將非不能軍正欲以朕為奇貨賣與劉旻耳悉斬以徇壬申帝以高平之敗已而被圍憂憤成疾悉以國事委皇子侍衛都指揮使承鈞六月癸亥撻烈獻所獲軍實于遼秋七月乙酉我國人有為契丹誤掠者遣使請于遼遼主詔悉歸之九月丙申以周人盜邊告于遼冬十一月遼彰國節度使蕭敵烈太保許從贇奏忻代二州之捷于遼是月帝疾革命皇子承鈞監國尋殂

案大

定錄周顯德二年春旻病死紀年通譜乾祐八年冬崇
死遼史應歷五年十一月乙未朔漢主崇祖皆乙卯年
也又周世宗實錄及薛居正五代史僭偽傳亦云顯德
二年十一月劉崇卒惟王保衡晉陽見聞要錄云甲寅
年春南伐敗歸夏周師攻圍旻積憂勞成心疾
是冬卒保衡故旻舊臣言當足信今從其說

帝生于

唐乾寧三年乙卯歲年六十

晉陽見聞要錄云乙卯生
卒年六十一當是衍一字

廟號世祖在位凡四年

論曰世謂世祖常致書于周求立子贊而不得後方稱
帝推其志是不以喪君為讎而以殺子為讎也要之贊
得立則漢祀未斬贊故不獨為世祖子矣懼劉氏之餒

而保一隅以圖存其志洵有足悲者高平之戰僅以身
免所不亡者天耳然則歷四君而卜年三十嗚呼夫豈
盡人力也哉



十國春秋卷一百四



總校官庶吉士臣張能照

校對官檢討臣王鍾健

謄錄貢生臣李敬敏

欽定四庫全書叢要

史部

十國春秋卷一百

十五

詳校官員外郎臣楊世綸




十國春秋卷一百五

檢討吳任臣撰

北漢二

睿宗本紀

睿宗名鈞初名承鈞世祖次子也以後唐天成元年丙

戌生幼而穎異性孝謹頗好學工書世祖旣晏駕承鈞

謂服喪以日易月非禮也始行三年喪禮奉表于遼自

稱曰男遼主述律

遼穆宗也

答之以詔呼為兒皇帝遣驃騎

大將軍知內侍省事劉承訓冊命承鈞為天子更名鈞

時年二十九也

晉陽見聞要錄九國志皆云承鈞立時年二十九

仍稱乾祐不

改元

乾祐八年春二月庚子朔日食庚申遣使如遼請加上
天順皇帝尊號不許夏六月丁未蜀主遣使約出兵攻
周許之

乾祐九年夏四月葬神武皇帝于交城北山上廟號六
月甲子遣使于遼議軍事是冬服除改明年為天會元

年

九國志云承鈞立服喪三年至乾祐九年服除改十年為天會元年

天會元年春正月己丑朔大赦以子繼恩為太原尹翰

林學士衛融為中書侍郎同平章事內客省使段常

云一

本作恒宗避諱也

為樞密使侍衛都指揮使蔚進掌親軍潛結

江南西川為外援夏五月辛卯遣使貢方物于遼秋七

月初立七廟于高祖舊第號顯聖宮

七廟當是前漢高祖邦文祖滿德祖

昂翼祖僕顯祖璵高祖曷世祖旻也未審是非又天福十二年祖廟中有光武皇帝亦在不祧今七廟數不

知與否冬十月癸亥麟州刺史楊崇訓舉城降周周以為

麟州防禦使十一月遼遣大同節度使侍中高勳將兵會李存瓌擊周至潞州城下而還帝知契丹不足恃而不敢遽絕贈勳甚厚十二月唐使者陳處堯自契丹來遊太原

十國紀年作唐兵部郎中段處常晉陽見聞錄云陳處堯如契丹乞兵因來遊今從其說

帝

厚禮之留數日北還

天會二年春正月丙子周建雄節度使楊廷璋敗我兵于隰州城下時周隰州刺史孫議暴卒廷璋檄都監閑廐使李謙溥權知州事未幾我兵至攻城久不下廷璋

潛與謙溥約各募死士百人襲我營我兵驚潰遂解還
夏六月壬子周昭義節度使李筠寇石會關遂拔六寨
乙卯周李謙溥陷孝義冬十一月遣使如遼告周復來
侵乙丑再遣使如遼十二月庚辰又遣使如遼是冬國
中大雪國人唱曰生怕赤真人都來一夜春
人以為宋受命之應
天會二年夏四月戊戌遼以南京留守蕭思溫為兵部
都總管擊周師是月周攻契丹拔益津瓦橋淤口三關
遼主遣使來告急五月乙巳朔周師陷瀛莫二州帝諭

發兵撓周邊遣使日馳七百里會周主南歸乃止庚戌
周李重進將兵出土門入寇己巳敗我兵于百井斬首
二千餘級六月周李筠入寇陷遼州獲我刺史張丕辛
己周楊廷璋侵邊降我堡寨十三是月周主殂梁王宗
訓立冬十一月遼師謀會我兵攻周鎮定二州

天會四年春正月乙巳周禪位于宋宋改元建隆夏四

月周昭義節度使李筠起兵拒宋遂殺澤州刺史據其

城已而遣牙將劉繼冲

左編又作
衙校劉忠

判官孫孚奉表稱臣

執其監軍周光遜開廐使李廷玉送于我乞兵為援帝

欲謀于遼繼冲述筠意請無用契丹兵帝即率本國兵

自將出團柏谷羣臣餞于汾水僕射趙華獨言筠舉事

輕易未可為恃帝至于太平驛封筠西平王

一作隴西郡王筠

見帝儀衛不備非如王者心甚悔因自陳受郭氏恩不

敢愛死帝與周世讎亦不悅其說遂使宣徽使盧贊監

其軍筠心益不平與贊多不協乃留長子守節居潞而

自引眾南向帝聞贊與筠異遣平章事衛融和解之是

月遣河陽節度使范守圖將兵援筠夏五月乙亥朔日

有食之癸卯宋將石守信敗李筠于長平壬子以潞州

歸附遣使告遼丁巳宋帝親征筠丁卯宋石守信高懷

德大破筠兵盧贊死焉筠走保澤州宋帝列柵圍之六

月辛未澤州陷李筠赴火死衛融被執宋帝以鐵搗擊

融首不死釋之

後擢為太府卿

帝懼引師歸乙酉宋帝攻潞州

丁亥李守節以潞州降宋甲午宋將折德展敗我兵于

沙谷砦

斬首五百級

是月宋兵圍石州帝遣使告遼遼詔阿

利率四部來援復命蕭思溫以三部兵助之秋九月壬寅宋昭義節度使李繼勳寇平遙縣俘獲甚衆十月乙酉宋晉州兵馬鈐轄荆罕儒襲汾州死焉

石進二十九人坐不救死

天會五年冬十二月乙未李繼勳大敗我兵執遼州刺

史傳廷彥及其弟勳

是時帝結代北諸部侵麟州夏州李彝興遣李彝玉會諸鎮兵來禦

乃引還

天會六年春二月我兵侵晉潞二州為宋守將所敗三月宋詔我降人徙家于邢洺計口給粟夏四月宋命郭

進控西山武守琪戍晉州李謙溥守隰州以備我師是月太原民潛逃降宋者四百七十人秋七月捉生指揮使路貴等十一人降宋宋並補內殿直

天會七年春二月遣使如遼言我國欲巡邊徼乞張聲援秋七月宿衛殿直行首王隱劉紹趙鸞

一作劉昭趙鸞

等謀

亂事覺伏誅辭連樞密使段常出常為汾州刺史尋縊殺之是月以宋師將侵邊告遼八月宋王全斌

宋史作邢州王

實全入寇攻樂平拱衛指揮使王超散指揮使元威侯霸

榮率所部千八百人降之侍衛都指揮使蔚進馬軍都

指揮使郝貴超與契丹悉兵往救三戰皆敗績樂平遂

陷宋改樂平為平晉軍以降卒為效順軍賜以錢帛由

是靜陽十八砦相率降宋九月我以契丹兵攻平晉軍

宋雒州防禦使克西山巡檢郭進將兵來擊契丹兵遂

引歸是役也初有軍校自西山詣汴誣訟郭進不法事

宋太祖送進令殺之會我兵侵平晉軍進語其人

曰汝敢論我信有膽氣今貫汝罪汝能掩殺敵兵即當

薦汝如敗可自投河東其人踴躍赴戰遂敗我兵進即

奏聞以還其職冬十月丙申以宋侵告遼以抱腹山人郭無為

同平章事帝自潞州之敗日懼宋師至既以趙弘為相
又召無為參議中書復以五臺山僧繼顥署鴻臚卿參
預國政已又以弘與無為議論不合乃出弘汾州而機
務悉委無為掌之十二月帝遣從子侍衛親軍使劉繼
文如遼遼拘之不遣先是世祖凡舉事必稟命于遼歲
使不絕及帝立禮文多畧遼主乃遺書來責擅改元援
李筠殺段常三罪

宋史云契丹主遣使責鈞曰爾不稟
我命其罪三擅改年號一也助李筠

有所覬覦二也
殺段常三也

帝惶恐遣繼文謝曰父為子隱願赦之

自是契丹使不來而使往輒見留羣臣悉以使北為懼
乙亥衛州刺史楊璘為宋折德展所擒是歲宋改元乾
德

天會八年春正月宋帝謀取我國宰相趙普諫曰太原
當西北二面太原既下則二邊之患我獨當之不如俟
削平諸邦太原彈丸黑子之地將何所避從之戊戌帝
以宋將來襲馳告遼二月宋遣曹彬會李繼勲及兵馬
鈐轄康延沼馬步軍都軍頭尹訓率兵入寇攻遼石二

州帝遣郝貴超往援戰于遼州城下我師大敗遼州刺

史杜延韜與拱衛都指揮使冀進兵馬都監侯美籍部

兵三千人舉城降宋

案宋太祖本紀杜延韜降在二月戊申朔

宋賜延韜等

襲衣銀帶器幣鞍勒馬命降卒以效順懷恩為名壬子

遼西南面招討使撻烈以六萬騎來援壬申我兵敗宋

兵于石州遣使告遼三月耀州團練使周審玉等四人

叛降宋

一作周玉今從宋史

宋賜審玉襲衣金帶絹千匹銀五百

兩鞍勒馬仍賜名承璿以為左千衛大將軍領汾州團

練使夏四月乙巳以擊退宋軍遣使謝遼宋遣馬軍都校劉光戎潞州以備我師是歲蜀主昶遣使齎帛書通好于我畧曰早歲曾奉尺書尋達睿聽丹素備陳于翰墨歡盟已保于金蘭洎傳弔伐之嘉音實動輔車之喜色至境上為宋疆吏所獲

天會九年春二月壬寅朔日當食不虧

天會十年春正月宋安國節度使羅彥瓌等敗我兵于靜陽執守將鹿英以歸夏六月甲辰月犯心前星秋七

月遣使貢遼金器鎧甲冬十月帝母皇太后缺氏殂庚辰遼遣使來賻弔十二月復取宋遼州戊辰遣使貢于遼

天會十一年春三月五星聚奎招收指揮使閻章以石盆砦詣宋鎮州降夏四月鴻唐砦招收指揮使樊暉殺監軍成昭叛降宋六月戊午朔日有食之

天會十二年春正月偏成砦招收指揮使任恩等百五十人詣宋晉州降三月宋鎮州守將破我馬鞍山砦秋

七月烏玉砦主胡遇等百三十九人詣宋鎮州降帝自
李筠敗狼狽而歸又失遼之歡心勢力窘弱憂瘁得疾
卧勤政閣召郭無為執手以後事畀之戊申遂殂

遼史作秋

七月辛丑
漢主殂

年四十三養子繼恩立上謚曰孝和皇帝廟

號睿宗帝嗣位之後勤于為政愛民禮士故雖兵戈不
息而境內粗安初宋太祖常因界上謀者謂帝曰君家
與周世讎宜其不屈今我與爾無所間何謂困此一方
民若有志于中國宜下太行以決勝負帝遣謀者復命

曰河東土地兵甲不足以當中國之十一然鈞非家世
叛者區區守此蓋懼漢氏之不血食也太祖哀其言笑
謂諜者曰為我語鈞開爾一路以為生故終其世不至
大舉加兵焉

諜者十國紀年
作邢州人蓋留

少主本紀

少主繼恩本姓薛氏父釗晉初為護聖營卒娶世祖女
生繼恩高祖典禁兵以釗從子婿也除其軍籍置之門
下釗無才能但衣食之而無所用高祖後領方鎮爵位

通顯妻以世祖女視永寧公主故姊妹行也

高祖女封永寧公主

宗承渥尚公主

常貴倨居中釗罕得見釗快快一日乘醉求見

引佩刀刺之世祖女奮衣得脫傷而不死釗即自裁時

繼恩尚幼世祖以睿宗無嗣令養為子已而世祖女再

適何氏生繼元未幾何死世祖女亦歿睿宗復撫繼元

為子睿宗平日恒語郭無為繼恩殊非濟世才

繼恩事孝和盡

恭及為太原尹選軟不治

無為默然不對睿宗既殂繼恩告哀于契

丹後嗣皇帝位帝服縗裳視事寢處居勤政閣而孝和

帝故執事百司宿衛皆在太原府廨帝怨無為初不助
已且惡其專政加守司空外示優禮而內實疎之時天
會十二年七月也是月遼遣使來弔祭八月戊辰宋聞
我國有喪以內客省使盧懷忠等二十二人將禁兵赴
潞州昭義節度使李繼勳為行營前軍都部署侍衛步
軍都指揮使党進副之宣徽使曹彬為都監棣州防禦
使何繼筠為前鋒部署懷州防禦使康延沼為都監建
雄節度使趙贊為汾州路部署絳州防禦使司超副之

隰州刺史李謙溥為都監帥兵大入九月庚子帝命劉

繼業馬峰等領軍扼團柏谷峰至銅鍋河

宋史作洞渦河今從宋紀

事本末

李繼勳前鋒將何繼筠擊破我兵斬首三千級遂

奪汾河橋薄太原城下焚延夏門左勝軍使李瓊叛降

宋宋賜瓊襲衣金帶鞍勒馬帝大懼帝欲逐郭無為月

餘不能決帝時獨處一室行喪左右親信無得從者或

勸召之帝猶豫不決已酉供奉官侯霸榮率十餘人挺

刃入閣反扃其戶帝驚起繞屏走霸榮以刃搯其胸弑

之歐陽史云繼恩置酒會諸大臣宗子飲罷卧閣中侯霸榮率十餘人挺刃入閣閉戶而殺之今從宋史

無為使人梯屋入殺霸榮并其黨帝立裁六十餘日并

人疑無為授意于霸榮亟殺之以滅口而左右卒莫能

明也無為與羣臣議立帝之弟繼元平章中書事張昭

敏獨曰少主非劉氏故嗣位不終今宜立宗姓以慰民

望世祖嫡孫繼文久留契丹歷險危宜迎立之可以固

宗社結強援無為不從以繼元易制遂立之

李燾長編
云繼恩皓

腹多髯長上短下乘馬即魁梧
徒步即侏儒昏定晨省無違禮

英武帝本紀

英武帝繼元當天會初授檢校司徒歸義府都督已而加太保遷右金吾衛大將軍克大內都點檢少主時復進太師兼太原尹既襲位仍稱天會不改元復修好契丹于十二年十一月遣使告即位且乞師遼主兀律乃遣撻烈為兵馬總管將諸道兵救之宋亦詔諭我國令降約以平盧節度使授帝又別賜郭無為詔許以安國節度使無為得詔色動勸帝納款帝不從初宋使諜者

惠璘詐稱殿前指揮使負罪來奔無為知其謀署為供奉官至是宗師入境璘即奔赴至嵐谷為候吏所獲送太原帝命無為鞫之釋不問會有李超者發璘奸狀上聞無為怒并超斬之以滅口未幾宗李繼勲等聞契丹兵來皆引去我兵因大掠晉絳二州是月帝疑孝和后郭氏殺其故后段氏遂遣嬖臣弑后于喪次帝為人殘忍而無禮宮中嬪御遭罹逼辱無復嫌間而世祖子十人鎬錯等皆以幽囚死

天會十三年春二月宋帝將發自汴先遣李繼勲趙贊
郭進司超等帥兵赴晉陽是役也宋帝問其臣魏仁浦
曰朕欲親征太原何如仁浦對曰欲速則不達惟陛下
重之宋帝不聽三月宋帝至于太原以我太谷令梁文
陟為太子洗馬祁令張續為右贊善大夫及城下李繼
勲已先敗我兵宋帝命築長連城圍之立砦于城四面
繼勲軍于南趙贊軍于西曹彬軍于北党進軍于東帝
命劉繼業等乘晦突門犯東西砦戰敗遁歸宋帝又命

壅汾晉二水以灌城并人大恐會城中有積草漂出塞
之得無害郭無為復勸帝出降帝猶恃遼為援未之許
也一日因宴羣臣無為痛哭于庭曰柰何以空城抗百
萬之師乎引佩刀欲自刺冀動衆心帝遽降階執其手
引升坐而止甲寅遣使乞封冊于遼且趣援師甲子遣
使進白廬于遼是月宋又遣海州刺史孫方進圍滄州
守陴者聲言旦夕契丹兵至夏四月契丹兵分道入援
宋何繼筠逆戰于陽曲北韓重贊一作重斌逆戰于定州契

丹兵大敗宋帝命以所獲首級鎧甲示太原城下憲州

判官史昭文

宋史作推官

嵐州刺史趙弘各以城降宋五月

遣李匡弼李元素等如遼賀天清節

按遼史有劉繼文然繼文尙留契丹

至十四年放

閏月遼主遣韓知璠

遼史作知範

冊立帝為大

回今不從

漢皇帝知璠習兵事居圍城中晝夜督察盡心固守宋

驍將石漢卿等多戰死我兵亦屢敗一日我兵自西長

連城出將焚其攻戰之具反為宋師擊卻之斬首萬餘

級是夜謀者忽傳呼壁外帝降宋帝令衛士擐甲將開

壁門入作使趙璲曰受降如受敵詎可中夜輕出宋帝乃止契丹復遣南大王來援宋都指揮使李懷忠曰敵勢已困若選勁兵急攻破在旦夕殿前都虞候趙廷翰請先登以盡死力宋帝不許曰汝曹皆我所訓練無不以一當百所以備肘腋同休戚也我寧不得太原豈忍驅汝曹冒鋒刃蹈必死之地乎衆皆感泣時宋師頓兵甘草地中會暑雨軍士多疾太常博士李光贊請班師曰蕞爾晉陽豈須親討重勞飛輓取怨黔黎豈若回鑒

汴都屯兵上黨使夏取其麥秋取其禾既寬力役之征
便是蕩平之策宋帝以問趙普普亦以為然乃分兵屯
鎮潞遷太原民萬餘戶于山東河南遂引兵還帝命決
城下水注之臺駘澤水已落而城多摧圯韓知璠歎曰
宋師之引水浸城也知其一不知其二若先浸而後涸
則并人無噍類矣帝又籍宋所棄軍儲得粟三十萬茶
絹各數萬喪敗之餘賴此少濟是月郭無為伏誅初太
原之圍南城為汾水所陷宋帝至長隄觀焉無為謀出

降因請自將夜擊宋師帝選精甲千人付無為自登延
夏門送之無為行至北橋值風雨而止至是閩人衛德
貴告其事且言無為獻地之謀蹤跡屢露罪不可赦乃
有是處分

天會十四年春正月契丹歸我使臣十六人仍詔世祖
孫繼文為平章事李匡弼為樞密使時韓知璠歸國言
我國庶事多梗而無輔臣政事令趙高勲亦言晉陽為
父子國盡拘其使無謂也遂有是命已而左右譖繼文

帝乃出繼文為代州刺史李匡弼為憲州刺史繼文隨
遷鴈門節度使夏四月辛未朔日食冬十二月以僧繼
顯為大師兼中書令庚午遣使貢于遼

天會十五年冬十月癸亥朔日有食之癸未遣使貢于
遼十二月遼主子隆緒生

天會十六年春二月癸亥以遼主皇子生遣使往賀秋
九月丁巳朔日食冬十二月乙卯大雨雪是歲大饑
天會十七年春正月遣使貢于遼夏六月遣使以宋事

告遼冬十二月帝殺其從兄

一作弟

大內都檢點繼欽戊

戌帝將改元遣使稟命于遼是歲僧繼顯卒追封定王
廣運元年春正月改元二月庚辰朔日有食之是月遼
命涿州刺史耶律昌米貽書于宋之雄州請通好宋命
知州孫全興答書許之

廣運二年春二月癸亥遣鴈門節度使皇從兄繼文貢

遼方物三月遼與宋求成

遼遣克沙骨慎思以書如宋
結成宋遣郝榮信呂端報聘

自是吉山慶弔
並遣使往還

遣使來告命我通好于宋無妄興師帝

聞命慟哭謀出兵攻契丹宣徽使馬峰固諫乃止夏六月遼主冊帝為大漢英武皇帝賜御衣玉帶鞍馬等物甲子彗星見東方長四丈秋七月辛未朔日食是時築隆州城于祁縣東三十里備宋師

廣運三年秋八月癸卯遣使于遼言天贊皇帝天清節我國設無遮會飯僧祝釐已酉以宋事告遼是月宋侍衛都指揮使党進宣徽北院使潘美及楊光美牛思進

米文義

一作宋文義

率兵分五道入寇又遣郭進郝崇信王

政忠閻彥進齊超孫晏宣安守忠齊延琛穆彥超

一作璋

等分寇忻代汾沁遼石等州

宋史云郭進入忻代路郝崇信王政忠入汾州路閻

彥進齊超入沁州路孫晏宣安守忠入遼州路齊延琛穆彥璋入石州路諸將所至克捷敗

我兵于太原城北是時我謀者趙訓為宋青州將所擒

宋帝釋之給服裝放歸九月壬午帝乞援師于遼遼主

命南府宰相耶律沙冀王敵烈來援戊子復遣駙馬都

尉盧俊至遼告急是月我師遇党進于太原城北敗績

失其兵馬千餘郭進鹵我山北民三萬七千人冬十月

宋遼州監押馬繼恩入太原境燒燔四十餘砦鹵牛羊數千郭進陷壽陽鹵我民九千人穆彥超入太原境鹵我民二千人党進又敗我兵于太原城下是月宋帝崩晉王光義即位改元太平興國召諸將還辛丑以宋師退遣使謝遼十二月丁未以宋師復至鹵掠軍儲告遼且乞賜糧為助

廣運四年春三月癸亥耶律沙敵烈歸獻援師所獲宋俘戊辰遼主詔以粟三十萬來助

宋史新編云契丹主發粟二十萬斛助北

漢夏五月遣使謝遼且以宋事告秋七月壬申以宋人
侵我告遼丙子遼遣使助戰馬八月貢遼葡萄酒冬十
月乙酉復遣使以宋事告遼是歲胡桃砦指揮使史溫
等叛附宋宋帝謂齊王廷美曰太原我必取之夏州定
難節度使李^缺睿來侵吳堡砦斬首七百級鹵牛羊千
計執我砦主侯遇

廣運五年

廣運六年春正月宋始議興兵宋臣薛居正等多以為

不可

宋史云宰相薛居正曰昔周世宗舉兵太原倚契丹之援堅壁不戰以至師老而歸及太祖破契丹

于雁門關南盡驅其民分布河洛之間雖巢穴尚存而危已甚得之不足以闢土舍之不足以為患願熟慮之

太宗曰今者事同而勢異彼弱而我強昔先王破契丹徙其人而空其地者正為今日事也

曹彬曰

以國家兵甲精銳剪太原之孤壘如摧枯拉朽爾宋帝

意乃決

先是宋太祖方征河東白雲先生陳搏諫止之會軍已興及兵還果無功至是搏復來始云河

東可取

命潘美為北路都招討使帥崔彥進李漢瓊劉遇

曹翰米信田重進分道圍汾沁嵐諸州又以郭進為太

原石嶺關都部署以斷燕薊援師時夏州定難節度使

李繼筠亦遣將李光遠光憲統番漢兵渡河略太原境以張宋軍之勢乙酉遼遣撻馬長壽使宋問興師侵我之故宋帝曰河東逆命所當問罪若北朝不援和約如故不然則戰二月甲子宋帝自帥師來攻發汴京令齊王光美扈從丁卯帝以宋師壓境遣使乞援于遼戊寅宋帝次澶州有太僕寺丞宋捷者迎謁道左宋帝見其姓名喜曰吾其捷矣三月庚辰朔遼主遣南府宰相耶律沙為都統冀王敵烈為監軍來援又命南院大王斜

軫以所部從樞密副使耶律抹只督之丙戌遼主詔北
院大王奚底乙室王撒合等以兵戍燕己丑帝復以蠟
九帛書告宋兵入境于遼遼命大將軍韓侂大同節度
使耶律善補以本路兵南援丁酉耶律沙等與宋將郭
進遇于白馬嶺時契丹兵阻大澗沙與諸將欲待後軍
至而戰冀王敵烈監軍抹只等以為急擊之便沙不能
奪敵烈等以先鋒渡澗未半為宋人所擊兵潰敵烈及
其子蛙哥沙之子德里突呂不部節度使都敏

一作令
穩都敏

黃皮室詳穩唐筈等五將俱沒士卒死傷甚衆會南院

大王斜軫兵至萬矢俱發敵軍始退

是時宋田祚欽護石嶺屯軍恣為姦

利郭進不能禁欽祚復數加凌侮進武人剛烈不能堪遂縊而死欽祚以卒中風眩聞宋太宗悼惜良久贈安國節度使尋詔夏四月辛亥帝以行軍事宜奏遼駙馬以牛思進代之

都尉盧俊自代州馳狀于遼告急宋帝發鎮州宋行營都監折御卿分兵攻岢嵐軍遂陷嵐州癸亥宋解暉等陷隆州庚午宋帝次太原駐汾東行營辛未至于太原城潘美等屢敗我兵進築土城長圍四合矢石如雨晝

夜不息宋帝督益急城無完堞我師外援弗至餉道又絕國人大懼宋帝屢以手詔諭帝降使者至城守陴者輒不納壬申宋帝至城西督諸將士薄城下列陳于前蹲甲交射矢集城上如蝟毛時宗捕我城中人告云帝以十錢購一矢凡聚百餘萬宋帝笑曰此為我畜也五月庚辰宣徽使范超叛降宋為宋兵所殺壬午馬軍都指揮使郭萬超叛踰城降宋自是親信之臣多亡城中益危迫宋帝移城南復手詔諭帝曰越王吳王獻地歸

朝或授以大藩或列于上將臣僚子弟皆享官封繼元

速降當保富貴城上有答白雲如人狀

九國志載宋築長堤壅汾灌城

族考癸未前樞密使馬峰入見流涕歷數興亡之理是夜

帝乃遣客省使李勲奉表請降宋帝賜勲襲衣金帶銀

器錦綵銀鞍勒馬復遣通事舍人薛文寶齎詔答之夜

漏未盡宋帝至城北張樂宴從臣于城臺甲午遲明帝

率官屬縞衣紗帽待罪臺下宋帝釋之賜襲衣玉帶金

銀鞍勒馬三匹金器五百兩銀器五千兩錦綵二千段

文武官各賜衣金銀帶器幣鞍勒馬詔升臺帝叩頭言
臣聞車駕親征即願束身歸罪蓋亡命者懼死逼臣不
得降爾宋帝籍軍中亡投我者數百人選其巨室以從
軍法餘賜服及錢帛分隸諸將授帝檢校太師右衛上
將軍封彭城郡公宰相李憚等授官有差皇從兄繼文
駙馬都尉盧俊皆出奔于遼宋館帝于行宮所給賜甚
厚命中使康仁寶監之帝獻官伎百餘人于宋以賜將
校宋凡得州十軍一縣四十一

或作州十縣四十今
從李燾續通鑑長編戶

十三萬五千二百二十兵三萬命劉保勲知太原府改

太原為平晉縣宋帝因作平晉詩令從臣和焉

又命撰平北漢

碑文先是宋太宗將至晉陽語侍者我以端午日當置酒

高會于太原城中及帝降果五月五日也太原前臨臺

駘澤後倚懸壘山堅而難拔太宗隨命毀舊城以杜尾

大之患

陸游筆記曰太平興國四年平太原降為并州廢舊城徙州於榆次今太原則又非榆次乃三

交域也城在舊城西北三百里亦形勝之地本名故軍又常為唐明鎮有晉文公廟甚盛平太原後三年帥潘美奏乞為并州徙之于是徙晉文公廟以廟之故址為州治又徙陽曲縣于三交而榆次復為縣

又以

榆次縣為并州遣使分部徙太原民居之縱火焚太原
廬舍老幼趨城門不及焚死者甚衆未幾令康仁寶護
劉氏親屬百餘人赴汴所過續食賜京城甲第一區歲

時優賚有加太平興國六年太宗詔加彭城公開府儀
同三司雍熙三年建房州為保康軍以帝為節度使淳

化中薨遺奏以六歲子三豬為託贈中書令追封彭城

郡王賙賻加等三豬賜名守節授西京作坊副使

東京
事畧

作西京世祖自乾祐四年稱帝歷四主二十九年而亡

作坊使

英武帝美風儀善談論頗通禪學居潛邸時常假僧繼
顯紫檀如意每接僧則頂帽具三衣秉此揮譚名為握
君踐阼後御下最刻臣下有忤意必族其家其被殺傷
者自故相張昭敏以下不可勝紀及窮蹙始降宋太宗
終保全之嘗謂近臣曰晉司馬昭以劉禪思蜀之對戲
之云何乃似卻正之言此不仁之甚也亡國之君皆暗
懦所至苟有遠識豈至滅亡此可愍傷何反戲侮乎劉
繼元朕所鹵者待之若賓客猶恐不慰其意爾守節後

為崇儀使改右屯衛將軍天禧四年特遷右武衛將軍
改右驍衛將軍

論曰歐陽五代史言孝和帝歿于天會十三年英武帝
嗣位即改元廣運皆非也常稽定王劉繼顯碑文為右
諫議大夫楊夢申所譏中云天會十二年今皇帝踐阼
之初年也十七年繼顯卒末署廣運元年歲次甲戌九
月丙午朔而李惲千佛樓碑銘亦署廣運二年歲次乙
亥八月庚午朔夢申與惲本北漢臣此最可信者予故

得据之以編漢年云至兩主踰年皆不改元蓋當時漢
隱帝周世宗孟蜀後主已行其事於北漢又何異焉

十國春秋卷一百五

十國春秋卷一百六

檢討具任臣撰

北漢三

列傳

睿宗后郭氏

郭姬

英武帝后段氏

馬氏

睿宗后郭氏天會時常養英武帝兄弟為子會英武帝故后段氏以小過被譴既而遇它疾死帝疑后寘之死

也內頗不平及即位遣嬖臣范超圖弑后后方縗服哭
孝和帝于柩前超執而縊殺之并滅劉氏子孫無遺類
郭姬者故醫僧女僧與嫠婦通而生姬有殊色睿宗納
之宮中嬖之將冊立為妃樞密使段常以姬所出非偶
恐貽笑隣國遂中止姻族親戚又多阻抑不盡用姬時
時望于執政常之獲罪人以為姬有力焉

英武帝后段氏素與孝和后不相協未幾以病薨英武
帝嗣位追封為皇后繼后馬氏左僕射峰女也不知所

終

湘陰公贊

附鞏廷美楊溫

湘陰公贊世祖子也高祖愛之以為己子

路振九國志云劉崇之長

子曰贊少慧黠高祖憐之錄為己子

乾祐元年拜武寧軍節度使二年加

同平章事郭威既敗慕容彥超于北郊隱帝遇弑威入

京師謂諸大臣密相推戴及見宰相馮道等道殊無意

威不得已見道下拜而道猶受拜如平時徐勞之曰公

行良苦威意色皆沮以為大臣未有推己意又難於自

立因與王峻入白太后推擇漢嗣羣臣乃共奏曰武寧

節度使贊高祖愛以為子宜立為嗣乃遣太師馮道率

百官往迎

周太祖實錄云 五月己丑太祖奏遣前太師馮道往彼諭旨太祖將奉表于徐州未知所

遣樞密直學士王度請行許之宰臣百
寮表祕書監趙上交齋詔同日首塗 道揣威意不在

贊直前問曰公此舉由東平威指天為誓道既行語左

右曰吾平生不作謬語人今謬語矣

五代史闕文曰按道廉智自將陽愚

遠禍恐不肯觸周祖未發
之機其徒欲歸美而云耳 道見贊傳太后意召之贊行

至宋州威已自澶州為兵士擁還京師王峻慮贊左右

生變遣侍衛馬軍指揮使郭崇威以兵七百騎衛贊崇威至宋州贊登樓問崇威所以來之意崇威曰澶州軍變懼未察之遣崇威護衛非惡意也贊召崇威崇威不敢進馮道出與崇威語崇威乃登樓見贊時護聖指揮使張令超帥步兵為贊宿衛判官董喬說贊曰觀崇威視瞻舉措必有異謀道路皆言郭威已為天子而陛下深入不止禍其至哉請急召令超諭以禍福使夜以兵劫崇威所屬士卒明日掠睢陽金帛募士卒北走太原

彼新定京邑未暇追我此策之上也贊猶豫未決是夕
崇威密誘令超歸郭氏盡奪贊部下兵郭威以書召道
先歸留其副趙上交王度奉贊入朝太后道乃辭贊先
還贊謂道曰寡人此來所恃者以公三十年舊相是以
不疑道默狀贊客將賈貞等數目道欲圖之贊曰勿草
草事豈出於公邪道已去崇威乃幽贊于外館殺賈貞
董裔及牙內都虞候劉福孔目官夏昭度等郭威已監
國太后乃下誥曰比者樞密使威志安宗社議立長君

以徐州節度使贊高祖近親立為漢嗣乃自藩鎮召赴
京師雖誥命已行而軍情不附天道在北人心靡東適
當改卜之初俾應分土之命贊可降授開府儀同三司
檢校太師上柱國封湘陰公贊卒以殺死

按通鑑周廣
順元年正月

戊寅殺湘陰公于京
州五代史曰幽死

初贊自徐州入也命右都押牙鞏

廷美

一作延
美非

元從教練使楊溫守徐州廷美溫聞贊不

得立乃奉贊妃董氏閉城拒命周太祖拜王彥超權武
寧節度使下詔諭廷美溫許以刺史復貽湘陰公書曰

爰念斯人盡心于主足以賞其忠義何由責以悔尤公
可達意更示委曲廷美溫不從乾祐四年三月彥超克
徐州廷美溫皆見殺

論曰歐陽公言常見周招廷美等詔書四皆言廷美等
曾已送款于周後懼罪而復叛然廷美等款狀卒不見
則周詔亦不足据也當周漢革命之時中原已非劉氏
有矣而廷美溫獨以區區孤城為贊堅守以死跡其始
終亦何媿死節之士哉朱子作通鑑綱目書曰湘陰公

故將輩廷美等舉兵徐州其深得春秋之旨夫

世祖諸子鎬錡錫錯銑

世祖孫彭城郡王繼文

繼欽

世祖子十人見于史籍者湘陰公孝和帝外曰鎬曰錡

曰錫

一作承錫

曰錯曰銑於英武帝皆為諸父鎬與錡錫視

諸昆弟最有賢行英武帝用羣小譖幽之別室未踰年
俱瘐死錯銑亦隨被殺獨銑以佯愚獲免錡或作饒一
曰錡與饒為二人云

繼文世祖嫡孫也為人魁梧有氣局沉毅寡言歷官侍衛親軍使天會時契丹來問罪輒拘繫行人數輩睿宗乃命繼文往賀因請命亦被留不發未幾遼主怒解盡歸使者十六人厚禮以遣而繼文與焉時英武帝嗣位三年也遼主仍移書令以繼文同平章事繼文歸秉國政左右害其寵多譖毀之已而出為代州刺史國亡復奔契丹封彭城郡王終於其國

繼欽世祖諸孫也累官大內都檢點初睿宗以英武帝

弟兄幼弱委繼欽掌禁衛事以為副及英武帝立親舊
多所誅放繼欽謝病請罷英武帝曰繼欽但事先帝豈
肯為我盡力邪黜居交城尋遣人殺之

論曰鎬錡錫銑賢足亢宗繼文繼欽才堪禦侮孝和舍
昆從之羣英立異姓以為後卒至本支既撥邦國淪亡
莒人滅鄆實有以自取之矣

定王繼顥

劉繼業

劉繼忠

繼顥故燕王劉守光子也守光之死以孽子得不殺削

髮為浮圖後居五臺山為人多智數善商財利自世祖時頗已賴之睿宗嗣位用宗姓例拜鴻臚卿繼顯能講華嚴經手執香如意紫檀鑲成芬馨滿室四方爭為供施多積畜以佐國用五臺當契丹界上繼顯常得其馬以獻號添都馬歲率數百匹又遊華嚴見地有寶氣乃於團柏谷置銀冶募民鑿山取礦烹銀官收十之四國用多於此取給即其地建寶興軍英武帝立繼顯知後宮多內寵獻首飾數百副加都統進太師兼中書令天

會十七年卒追封定王劉繼業本姓楊氏太原人父信
事高祖為麟州刺史繼業弱冠事世祖以驍勇聞屢立
戰功國人號為楊無敵睿宗賜劉姓比于諸子累官建
雄軍節度使廣運時繼業扞太原城東南面殺傷宗師
無算及英武帝降宗繼業猶據城苦戰宗太宗素聞其
勇欲生致之諭英武帝令招繼業隨遣親信往為開陳
禍福繼業乃北面再拜大慟釋甲入汴京太宗撫慰良
久復其姓止名業授左領軍衛大將軍頃之拜代州刺

史敗契丹兵于雁門殺其將蕭咄李後數年與契丹耶律斜軫戰陳家谷敗死贈太尉子六人延朗延浦延訓延瓌延貴延彬事具宋史

續通鑑又云繼業本名劉繼楊重貴世祖賜今姓名

忠少主之弟也亦睿宗養子賜姓劉氏睿宗疾革郭無為建議盡斥公族出繼忠守忻州繼忠自稱嘗使契丹得冷痼病定襄地寒願留養晉陽時少主監國責其觀望趣令就道繼忠頗有怨語或以白少主尋縊殺之

十國春秋卷一百六